

Pablotenipa Corosadenidsa ima teppe dosse quinajaro

Colosenses

Odsa panani Corosapi Epeso huajira tanidsa odsa panani tojajaro. Pablopa Epesohuaji madidsa Jesocristo tahimari mari icanabaquijari. Nahi Corosacca madija ojaría, oni Epafra, Pablocca marinaja mittadsa Jesodsa jehe najari, quinahi nade. Dsotode pocca odsahuaji toccanidsa pohuana Corosacca madija mari icanabaquijari, quinahi nade. Nadsapa madija mota huapi taha Jesodsa jehe quinajari.

Pablopa Corosahuajicca Jesodsa jehe quinajarideni maride tocca-jararaha poccadeni ima mittadsa pohuadenidsa ajijaro ima teppe dosse inajaro. Aja mamaridedeni ohuaha Corosacca madija mari icanabaquidisa pajissacca ima jeraraha mari mari quinajari. Poccadeni marinajadsa madija iboraqquri nahijine disseraqquri najari. –Icca marinajadsana ticassiejeranijine –quinajari. Nadsapa Pablo najaro ima mittadsa pohuadenidsa ajijaro ima teppe dsodo inajaro.

Pocca dsodonijipi: Cristopa huapima inahatoridsajari. Pohuana huapimadsa deni tojajari. Pohuadsara pajissa inadsapi icassiejeranitohui. Madie dsati naqui icajinitohui. Corosadenipa Dio jipa tahiccara inanamananijine pohuadenidsa dsodo inajaro.

Pablo, Timoteo tedseje nija quinajari

1 ¹¿Nija imecotedeni? Ohuapi Pablo. Dio jipa tadsa Jesocristocca dodosse ojajaro. Ohuemecote Timoteo tedseje tiadenidsa dsodo inajaro. ²Ajijaro imapi nani odsa panani Corosahuaji Diocca tiquejenarodenidsa dsodo inajaro. Tiadenipi imecotedeni. Jesocristodsa disseraqquri tiquinajaro. Icca Abi Dio tiadenidsa ima bicani inananiijine, inajaro. Dio pocca jonehe naqui tiadenidsa inananiijine, inajaro.

Pablopa Diocca toquejenaridenitohui Diodsa huati huati tajari

³Iapi huajiradsa titohuideni Diodsa huati huati ihinanajaro. Ia Medsede Jesocristocca Abi Diodsa huati huati inadsapi etti ajima ihinanajaro: –Jehe Abi Dio, Corosahuaji madimanajaridenicca ima bica tadsapi Tiadsa etidseni –ihinanajaro Diodsa. ⁴Aji tiadenipi Jesocristodsa jehe tidsanapomanani quinahi ima imittani. Aja Diocca toquejenarideni huapimadsa naqui

tetideni huanaquqiri nani quinahi ima imittani. ⁵Nema tiquinajaropi *itedsejemacca ima bicani iadsa tojanitohui nahatoqquri tiquinajaro. Aji: –Iapi memehuaji imadinitohui –tiquinajarojinea Diocca toquejenaridenidsa tetideni huanaquqiri najaropaji. Pajissacca ima aji Jesocristo tahimari icassiejeranijinecca tiadeni mari tocanabaquipodsama Jesocristopa memehuaji pocca madijadsa ima bicani inanajorajaro timittamanajaropaji. Nadsapi najaro imatohui timadimanajaro. ⁶Ajijaro Jesocristo tahimari ipina tiadeni mari tocanabaquijarissa najaria dsama onihi onihidsa madiridsamanajarideni mittaridsamanadsapa Jesocristodsa toquejenaripaja. Nadsapi ima bicani inanaridsamanajaro. Tiadeni naqui najarossa tiquinajaro. Dio titohuideni huati huana tahi ima timittamanadsapi pocca tohuati huanehedsa pajissa tiquinajarode. Nadsapi tiadeni naqui ima bicani tinanaridsamanajaropaji.

⁷Imecote bicabote Epafra pohuana Jesocristo tahimari tiadeni mari tocanabaquijaride. Pohua naco Jesocristocca dodosse tojajari, iadsama dsepe ijijari. Epafra Jesocristodsa dissera tadsapa tiadeni tonahattabaquihijine dsepe ihiji najaride. ⁸Epafra pohuana titahimarideni iadsa huati nanidsa imittajarode. Tiadenipi Jesocristocca toquejenaridenidsa tetideni huanaquqiri nani naqui imittade. Dio Corimejine Cristocca tohuati huanehema tetideni cahanari canajaropaji.

⁹Nadsapi titahimarideni imittapondsama titohuideni Diodsa huatide

inebo-jerajaropaji. Dio Pohua jipa tahicca nahatoqquri tiquinanidsa tanijine inadsa Pohuadsa huati huati ihidsanapo najaro. Tiadenidsa Pohua Corimecca nahatohue, pocca tohuattehe huapima da inanijine inadsa Pohuadsa huati huati ihidsanapo najaro. ¹⁰Jehe, Dio Corimecca tohuattehe ticajimanasapi timadimananissa tanijine nahatoqquri tiquinanitohui. Pina ia Medsede jipa tahiccassa tinanamananijine. Ima bicanira tinanamanadsapi ia Medsede huatidsehitohui. Tijinedeni ima bicani tojaridsadsapi tidsepedeni ijie huapima ahuato tanitohui. Pina ahua bono ocassa tahicca bonojide rajarissa tiquinanitohui. Nema tiquinadsapi Diodsa denima tinoccodeni tojidseradsanopnijine inadsa Pohuadsa huati huati ihidsanapo najaro.

¹¹Diocca dacorehepi deni tojanicca. Najaro dacorehema tiadeni tonadacorabaquihui nahijine inadsa Pohuadsa huati huati ihidsanapo najaro. Nani ima ocassera tanicca tiadenidsa anidsapi dacoco tijiradsa mohuaradsa tinahanamananijine. ¹²Tetidsemanadsa naqui tettideni Diodsa: –Abi Dio, epejeni, tijine bica tani –titiquina nanijine inadsa Pohuadsa huati huati ihidsanapo najaro. Diopa ia tonapajirabaquihissa tadsa Pohua dsamari memehuaji ia tonamadi-baquihitohui. Huapima pocca iquejenajaropi aji Pohuajine ibodi ssiaja tajaropaji. Najaroa aji pocca daniji bicani iadsa inanajorajaropaji. Nidsa Pohua madihihuaji Pohua ssiejenedsa bacco inadsapi iadsa da inanitohui, injaro. ¹³Dsidsinidsa imadipodsapi

imasiri iadsa dacorapode. Naraha Dio ia joca toninebaquidsa pocca ejedenicca cacahueheda ia tonana-baqqijaride. Diopa Pohua Bedidsa huati huana tajari. ¹⁴Pohua Bedi Jeso dsoqqejarijine icassiejerajaro. Icca imasirijine iadsa najidsohue ssonarinitohuiraha pohuajine jicani-ssa tadsapi Diopa iadsa: –Epeje, ticcadeni imasiri ohuati ajimani –najaripaja.

**Jesocristo dsoqqejarijinea
Dio tedseje icajonerajaropaji**

¹⁵Cristopa Dio Bedi. Pina Dio Pohuassa najari. Diopa innocodsa qqui inajarahi. Naraha Dio Pohua Bedi Jesocristo qqui tojajaripa pina Dio Pohua qqui inajarissa najari. Cristopa nami nahato-jeraccadsama madipojari. Aja huapima cajiridsajaripa dsotode inahatoridsajari. ¹⁶Diojine Pohua Bedina huapima inahatoridsajari. Aja memehuaaji aniridsajari inahato, aja namidsa aniridsajari inahato najari. Aja innocodsa qqui inaridsajari huapima inahato, aja innocodsa qqui inajarajari naco huapima inahato najari. Aja innocodsa qqui inajarajaridenicca taminedeni naco inahatobaqqi-ridsajari. Cacahuehe cajimana, dacorehe cajimana, nahatohue cajimana najarideni huapima pohuana pohuadeni nahatodedeni tojajari. Huapimapa pocca. ¹⁷Cristopa dsama nahato-jeraccadsama madipojari. Aja huapima aniridsamanajaripa pohuajine nahatoridsajari. Memecca, namicca huapimapa pohuana ecahuadsa aniridsahissa tajari. ¹⁸Aja Cristopa pohuadsa ijariqqi-jaro ia Dossede. Pihuapa pina

itatissa najari. Iapi pohua assiressa inajaro. Pihuapa nadsama madipojari. Pihuana dsoqqueheda tahide nahatonijari. Najaroa aji nahatoniecca ima pohuajine iadsa najorajaropaji. Nani pohua natti jajjamissanijine. Pihuana ima huapimadsa deni tojajari. ¹⁹Dio Pohua jipa tadsa pocca nahatohue nemanehe, pocca deni tojehe nemanehe, pocca dacorehe nemanehe huapimapi Jesocristodsana anijaro. ²⁰Diopa memehuaajicca, namihuaajicca animanaridsajari huapima Pohua tedseje cajonerahijine jipa tajari. Nama nadsapa Pohua Bedi Cristo icadossejari, huapima inajonebaqqihijine. Cristopa ahua porimacossanidsa dsoqqedsapa pohua emene toccajari. Najarojinea icca imasiri jicadsapi Dio tedseje icajonerajaropaji.

²¹Tahidepi Diodsa jidsaqquri tiquinaccade. Tibodidenidsa Diodsa jiperaqquri tiquinaccade. Tabaccorehe tinanamanajarojine Diocca huadi tiquejenaccade. ²²Naraha jidapapi Jesocristojine Diodsa tijonemanajaro. Aja Jesocristopa pohua assire pina essiressa najarods dsoqqehijine ocasserani ahujari. Nama najaria aja nidsa pohua Imehi Diohuaji ia tohuaccamacossani-baquidsapa Imehidsa: –Ajajaridenipa occa madija –nahitohui iadsa. Nahi Dio ia qqui tabaqqidsapa imasiri jirehe ibodissiajaqquri nehe ia qqui tabaqqihijine. Dio iadsa naco: –Tabaccoraqquri tiquinani –najarahitohui. Jesojine iadsa ima nohuereje najaro. ²³Nema tiquinanijinepi Jesodsapa jiji jehe tidsanapomanarini naji. Aji pohua tahimari icassiejeranijinecca

timittamanapojaro naqui tinebo-
mana tejeraji. – Jesocristojine
icassiejeradsapi Diodsa bacco inadsa
etidsenitohui – titidsanapomana
naji. Nadsama pohua tahimari huati
huati onajarona dsama huapima-
dsa ecomeraridsadsa tojaridsajaro-
paji. Ohua Pablo naqui Jeso ohua
cadossedsa pohua tahimari maride
ojaridsajaropajide.

**Pablopa Dio icadossedsa
Jesocristodsa
quequeriquimana najarideni
cacahuade tojjari**

²⁴Tiadenidsa ohuati huana tadsa
Dio Atti denima timittamana-
nijine onadsa ocasserani ohuaraha
ohuatidsejaro. Cristopa pohuadsa
ojariquimanahijine ocasserani
ahuajaripajade. Puhuadsa toque-
jenajaridenipa pina pohua assiressa
quinajari. Ohua naqui pohuadsa
toquejenajarideni acco ocama-
baquidsa ocasserani ohuajaropaji.
Nema onajaropi ohua ocasserani
ohuajaro, aja Jeso ocasserani ahua-
jaricca tadsajani tassaquidsapi
pohuadsa ojariquimanajarideni
denima tobicamanadsanapo-
huitohui. ²⁵Aja Dio ohua cadosse-
jaripa aji Jesocristodsa tijariqui-
manajarocca ima toccanissa tanijine
cacahuade ojaropaji. Najaroa aji
Dio Atti nemaneha onapjiranissa
tadsa tiadeni mari ocanabaquidi-
jaropaji. ²⁶Najaro imapi tahide icca
ididenidsama Diojine aniporaha
pohuadenidsapi ahuatora taccade.
Naraha jidapapi Dio pocca madija
bicaquiqui najaridenidsa ahuatora
inanajaropaji. ²⁷Dio Pohua tohuini
nadsa pohuadenidsa ahuatora inana-
jaropi jodio quejena-jarajarideni

naco pocca daniji bicani cajimana-
hitohui. Najaro imapi najorapo-
raha Diojine ahuatora tejeraccade.
Aji Diocca ima bicani Pohua
Bedi Jesocristo tibodidenidsa
tojaridsajaripaja. Najarijinena nidsa
tinahatonimanadsapi bica tanidsa
timadimananitohui. Diocca deni
tojehe naqui tiadenidsa tojanitohui.

²⁸Ajjaro ima Jesocristo tahi-
maripi iana eccoraridsajaro.
Dio iadsa tohuattehe inanadsa
madija huapima bodideni acco
acco ihicamabaquidi najari. Dio ia
tonahattabaquidsa naqui mari
mari ihicanaridsabaquidi najari.
Nadsapa nidsa aja mari icana-
baquidjarideni huapimapa memehua-
huaji Dio Pohua baccuhuaji domo
huadsapa aja Jesocristojine imari-
deni pajiranissa tani Dio qqui
inabaquihitohui. ²⁹Najarotohui
odsepe ijijaro. Ohuadsa najo taraha
dissera onajaro. Cristo pocca
dacorehema ohua tonadacoradsapi
odsepe ijidsanapojaro.

2 ¹Nahatoquiqui tiquinanijine
tiadenidsa dsodo onajaro. Aji
tiadenidsa Diocca ima bicani toja-
nijine odsepe ijijaropi ohuadsa najo
taraha nema nehe dissera onajaro.
Titohuideni, aji odsa panani
Laodiseahuaji madimanajarideni-
tohui naqui, aja madija huapima
ohua qqui toquina-jaraccajarideni-
tohui naqui dissera onajaro. ²Dio
tibodideni tonahatidsebaquihijine,
pocca tohuati huanehema tibodi-
deni ojariquinissa tanijine naqui
tohuini onajaro. Diocca ima bicani
ahuatora taporaha jidapapi ahuatora
tjaro timittamananissa tanijine
naqui dissera onajaro. Najaro ima
bicani Cristona paja. Puhuadsa

tinoccodeni tojidseradsanapo-
dsapi pohuadsa pajissa tiquina-
nissa taniijine titohuideni Diodsa
huatide dissera onajaro. ³Cristo-
dsapi tohuattehe huapima anijaro.
Nahatohue onihi onihi naqui pohua-
dsa anijaro. Aji tohuattehe bicanipi,
nahatohue onihi onihi naqui pina
todsepetaji huatini ccara taniccassa
nani, ihinanajaro. Imittanijine bica
tani. ⁴Tiadenidsa nema onajaropi
madija ohuahadeni tiadeni
tocamaidsabaquui-manarana. Atti-
deni bica tadsa huati huati toquina-
raha maidsamanajari. ⁵Ohuapi
tiadenidsa omadi-jeraraha obodi-
dsa jidseraquiri tiquinadsapi pina
tiadenidsa omadjarossa najaro.
Najaroa aji timadimananissa tani-
cca ima omittadsapi ohuatidsejaro.
Aji Jesocristodsa jehe tidsanapo-
manani dacorani omittadsa naqui
ohuatidsejarode.

**Cristopa iadsa camittehe
dsati da inajaro**

⁶Ia Medsede Jesocristo tahimari
timittamanapodsapi pohuadsa
jehe tiquinajarode. Nema tiquina-
dsapi pohuadsara timadimananissa
dsanapoji. ⁷Pohuadsa tidissera-
manani dsanapona. Pina ahua jabo
nami bodihuaji toccabaquidsapa
assire huahi dacorararissa tiquinaji.
Jesodsa tijabodeni denima napi-
dsanapona. Ajijaro marinaja pajissa-
cca tiadeni mari tocanabaquui-
manajarissa tinanamanaji, ticcadeni
jeheniji dacoranijine. Huajijiradsa
Diodsa naqui: – Jehe, epejeni.
Tijine bica tani – titiquina naji.

⁸Paji, madija ima ponimacca
huati toquinahi caji tahi. Pohua-
denipa poccadeni imadsa jehe

tiquinanijine titohuideni quinahi.
Naraha attidenidsa jehe tiquine-
jeraji, onajaro. Poccadeni imapi
pina pajissassa naraha maidsehe.
Poccadeni ima huapimapi pina
Jesocristo tahimari icassiejera-
nijineccassa nejerani. Poccadeni
imapi pina ididenicca ima ponima-
cca huarijonajarossa najaro. Pohua-
denipa ajijaro namicca dacorehe
cajimanadsa: – Ajima tinanamana-
dsapi ima bicani bacco tiquina-
nitohui – quiquinanaraha maidsa-
manajari.

⁹Cristopa madijassa naraha Dio-
cca huapima pohuadsa anijaro.
Diocca dacorehe, nahatohue, deni
tojehe, biquehe huapima cajijari.

¹⁰Nama nadsapa Cristona huapima-
dsa deni tojajari. Aja tocorime
tamedeni dacorehe cajimanaraha
Cristona najaridenidsa deni tojajari.
Nadsama tiadeni Cristocca tique-
jenajaropi pohuadsa tipajiramana-
nissa tani. Pohua cajijari huapima
naqui ticcadeni. ¹¹Cristocca tique-
jenadsapi pohuajine ticcadeni
imasiri jeo tehe jicajaro. Najaropi
pina ^{*}huissinajacca imassa najaro.
Jodiodenipa Diocca madija toque-
jenahijine huissinaja cacajimana
najari. Najaropi assiredenidsara
ahuato tajaro naraha tiadenipi
tibodidenina Cristojine tohuire-
jarona paji. ¹²Nadsama totopa ticaji-
manajaropi pina Cristo tedseje ppa
tidsamanajarossa najaro. Dio pocca
dacorehedsa Cristo inahatonijaridsa
pajissa tiquinadsapi Cristo pohua
tedseje tinahatonimanajarossa
tiquinajaro. ¹³Tahide tibodideni-
cca imasirima timadimanapodsapi
pina tecotajarossa naccade. Diocca
madija tiquejena-jeraccade. Naraha

jidapapi Diojine pina Cristo tedseje tinahatonimanajarossa tiquinadsapi camittehe dsati ticajimanajaro-paji. Cristojine Dio icca imasiridsa: –Epeje, ohuati ajimani –najari. ¹⁴Aji tahide Diocca dossenijidsa iboqquri inajaropi pina Diodsa cuenta icajijarossa, pina Dio debe inajarissa najaro. Icca ibohue manaconipi Dio ia tonajidso-baqquihitohuiraha aja Jesocristo ahua porimacossanidsa coba idsanamanadsapa Diojine icca ibohue manaconi inajicajaro. Pina ahua porimacossanidsa coba idsanajarossa najaropaji. ¹⁵Cristo ahua porimacossanidsa dsoqquedsapa Diojine tocorime taminedenicca dacorehe, poccadeni deni tojehe huapima inassamoridsajaropaji. Dio Pohujine najarideni ajamani toquejenahi huapimadsa ahuato inanajaro. Pina jadsiredsa ajamani toquejenajarideni todsepe toquejenajarissa quinajari.

**Ajijaro namidsa
madimanajaridenicca marinaja
tohuini tiquinejeraji**

¹⁶Jesocristo deni tojajaridsa tiquejenajaro. Nadsapa madija marinaja tahidecca ecahuamanajarodeni tiadenidsa atti atti quinadsa: –Poni, imitta-jerana –tiquinaji. Aji tijipamananiccadsa, dse tiquinaniccadsa atti atti quina-dsa timittamana-jeraji. Poccadeni marinaja tecahuamana-jeradsa pina poccadeni ejete jipaqquiecca, abadsico dsaticca, jassinajacca huada najarodsa tiadenidsa atti atti quinaraha pohuadeni attideni timittamana-jeraji. ¹⁷Nadsama najaro poccadeni marinaja maittaccadsama jodiodenidsa tojapojaropi

corimani. Pina madija ccajonadsa majijine corime qqui inapodsapi dsotodena assire ccajonahi nahato inajarossa najaro. Najaro mari-najapi jodiodenidsa Dio huati tadsa Jesocristotohui najoramanajari. Nidsa dsotodena Jesocristo pajissa assire ccajonajari. ¹⁸Madija ohuahadeni naco tiadenidsa attidenipa: –Ssamoqquri tiquinani. Jesojine ticassiejera-jeranitohui. Icca imana bica tani –quiquinanaraha: –Poni, imitta-jerana –tiquinaji. Paji, Diocca daniji bicani ticajimanajerana. Madija nama quinajaridenipa mamaidsadedeni. Pohuadenipa pohuadeni ajamani tonanamana-raha dsotodepa: –Nahatoqquri inani –quinajari. Poccadeni ima onihi naqui Diocca dodosse tabaqquidenidsa huahuatidsemana najari. Poccadeni ima onihi naqui caji tani. –Ibodi huatodsa innocodsa qqui ina tahi, pina icca huadadsa qqui inajarissa naha qqui ina tahi. Najarodsa tohuattehe onihi onihi iatta tani –quiquina-najari. Naraha aja pohuadenipa madijacca marinajadsara bodideni huatomanajarijine attideni: –Iapi deni iquejenani –quiquina-naraha pohuadeni attipi pajissa jerani. ¹⁹Pohuadenipa Cristodsa quejena-jarahi. Naraha iana Cristodsa ijariquidsapi pohuapa pina itatissa najari. Pohuana ijariqquinicca ia Dossede. Iapi pohua assirena najaro. Nadsama essirepitone, essicone najaro tassaqquidsapi essire dacorajaro. Ojari nehe tojajaro. Jijipajine nanapi najaro. Najarossa najaro Cristo pohuadsa itassaquidsapi daco ijirajaro. Cristo pohua attima, pocca dacorehema

ihinapi najaro. Nema inanipi Dio Pohua jipa tajarissa inanajaro.

²⁰Nadsama aji Cristocca tique-jenajaropi Cristo dsoqqedsapa tiadeni naqui pina Cristo pohua dsoqquejarissa tiquinajaropaji. Jidapapi ajijaro namicca tiquejena-gerani. Nadsapi ajijaro namidsa dacorehe cajimanajaridenicca marinajapi tiadenidsa nohuerajaropaji. Naraha ¿nejecotohui ticcadeni ima pina ajijaro namidsa madimanajaridenicca marinaja tecahuamanajaro-ssa najaro? Najaropi tinebomanaji. ²¹Ajijaro namidsa madimananjaridenicca marinaja onihi onihi najaropi pina: –Ajajari banipa oppina tahi, paji, dama tiquine-geraji –quiquinanajari. –Ajajari dsamatapa naco oppina tahi, paji, tijipamana tejeraji –quiquinanajari. –Oppina tahicca tidsepe tajodsa naco oppina tahi. Paji, ticcadeni ima tossamorana –quiquinanajari. ²²Naraha oppina tahi quiquinanajaricca pina bani, pina dsamatapa, nama nahicca huapimapa jicaca tahi. Najaro marinajapi madijacca marinaja. ²³Poccadeni marinaja imittadsapi: –Jehe, nahatoqquri najari –ina tani. Aja attidenipa: –Ajijaro marinaja ecahuadsapi icca ima Diodsa pajiranissa taniijine –quiquinanajari. Pohuadenipa pohuadeni ajamani tonanamanadsa: –Iapi dacorehe icappirani. Ssamqquri inani –quiquinanajari. Pohuadeni pohuadenijine pohuadeni assire ocasserani ahuajaro. Pina pohuadeni nepemimanajari, pohuadeni ime nabiqueramanajari. Naraha najaro poccadeni marinajapi ibodi tobicanijine pajira-gerani. Tabaccora tanicca tohuini

inajarocca inajicanijine pajira-gerani.

Memehujicca ima tohuira tiquinaji

3 ¹Aji tiadenipi Cristodsa jehe tiquinapodsama ticcadeni imabote tinebomanadsapi pina Cristo dsoqqedsa nahatonijarissa tiquinajaropaji. Cristo pohua tedseje tinahatonimanadsapi memehujaji aji Cristocca ima tohuira tiquinaji. Nahi memehujaja Cristo Imehi Dio inori nahatonihuaji huittaritari, Pohua tedseje dodossesse najari. ²Nani memehujicca ima tohuira tibodideni huatomanehe timadimanaji. Aji namicca ima tohuipi tetideni huatomana-geraji. ³Tiadenipi pina aja Cristo pohua huatiajarissa tiquinajaro, ajijaro namicca denima tohuini tiquine-geranijine. Ticcadeni camittehe dsatipi Cristodsa anijaro. Diona tiadenidsa ecahuajaro. ⁴Ticcadeni camittehe dsati jinedepa Cristo pohuana paja. Nidsa pohua ccanipomadsapa pohua dsibehinema, pocca deni tojehema ccanihitohui. Tiadeni naqui pohuadsa jidsera tanimanapomanitohui. Nadsapi pocca deni tojehe tiadenidsa tojajaropi ahuato tanitohui.

Iceca madie jadanicca ima, iceca madie dsaticca ima

⁵Ajijaro namicca ima aji tohuini tiquinanicca tiadenidsa aniraha tinajicamanaji. Maququidejedeni, jidapapi amoneje onihi aja ajapi tinebomanaji. Aja dsabisso tabiradeni naco dsohuato ticajigerajaro aja ajapi tinebomanaji. Amoneje tiadeni naqui maqqui

ticajimanaraha maqquideje ohuaha naja najapi tinebomanaji. Huananehe denima oppina tаница naqui tinebomanaji. Aji tiadeni tohuini tiquinanica tohui tiadeni dosse dosse nejeranijine tinebomanaji. Aji ima tabaccora tajaro tohuini tibodideni huahuatoma najaro naqui tinebomanaji. Madija dsepetaji qqui tiquinadsa naqui tohuini tiquinejeraji. Madijacca tarabadsa bica tаница acconi naqui tedimana tejeraji. Nadsama aji dsiniro, todsepetaji huemani ticajimanadsa tetidsemanajaropi pina madija Dio pajissaccadsa huatidsemanajaradsa pohuadeni cacahuade pohuamaccadsa huahuatidsemana najarissa tiquinarana. ⁶ Ajjjaro namicca ima nema najaroinena Diocca huadie bacco nanitohui. Nidsa Dio Attidsa iboqquri najaridenidsana najidsohue oppina tаница ssonarinitohui. ⁷ Tiadeni naqui Jesodsa jehe tiquinejeraccadsapi ajijaro namicca imadsa timadimanaccade. Ticcadeni madie jadani pina Dio Attidsa iboqquri najaridenicca madiessa tinanamanaccade. ⁸ Naraha jidapapi ima tabaccora tajaro huapima tinebomanaji. Huadie tinebomanaji. Madija tinajidsobaqquimana tajarajo. Madijadsa ima tinanamananijine naqui huatimana tiquinejeraji. Madija tamasso tamasso naqui tinebomanaji. Ima bica tejeranica jidsehe naqui tinebomanaji. ⁹ Madija ohuaha tedseje maidsa maidsa ticanaridsera tejeraji. Nani aji ticcadeni madie jadani tinebomanadsapi pina aji eterobote coro tiquinajarossa najaropaji. Jicajaro. ¹⁰ Aji tiadenidsa madie dsati tojajaropi

pina etero dsati tedsamanajarossa najaropaji. Nadsama aji tinahatomani-manadsapi Jesocristocca camittehe, pocca dacorehe tiadenidsa tojadsanapojaropaji. Najarojinea aji tiadeni Nahatode Diodsa ticahattera ticahattera dsanapodsapi aja tiadenidsa tojidseradsanapojaripaja, Dio Puhuassa tiquinanijine.

¹¹ Jidapapi Jesocristocca madiedsa tiquejenajaro, tibodideni dsati tojadsapi aja madija ohuaha ohuaha inaridsaraha Jesocristodsa ijariqquinissa tajaropaji. Jehe, aji tijariqquijaro motapa *jodio quejena-jarajari, motapa *jodioideni Cristodsa toquejenajari. Motapa huissinaja cajimanajari, motapa huissinaja cappiramanajari. Motapa dsama onihicca madija, motapa ssamoqquri najarideni. Motapa tarabadsajine *medse toquejenajarideni, motapa medse toquejenajarajarideni. Huapimapa Cristodsa toquejenaridsajaripaja. Puhuana ima huapimadsa deni tojajari. Puhuapa ia huapimadsa aniridsajari.

¹² Dio tiadeni tocattejidsubaqquijaripa pocca madija bicaqquri tiquinanijine. Diopa tiadenidsa huati huana tajari. Nema nadsapi tiadeni naqui madijadsa tetideni huanaqquri nadsa acco acco titicamabaqquimana najo. Bicaqquri tiquinadsa ima bicanira titinanamana naji. –Ohuana deni ojani –tiquinejeraji. Joneqquri tiquinadsa madijadsa catidseqquri tiquinaji. Tidsepedeni ijijarocca najo tadsa naqui nebona tejeraji. Madija mari ticananadsa naco tohuatta-jaradsapa

tedimana-jeradsa *mohuara-dsa mari ticanamanapomana, onajaro. ¹³Madijajine tiadenidsa bica tejeranicca inanamanadsapi mohuaradsa tinahanamanaji. Tedimana-jeradsa: –Tijinedeni ohuadsa bica tejeraraha epeje ohuati ajimani –titiquina naji. Pohuadenidsa tijinedeni bica tejersa naqui nama quinadsana bica tani. Pina ia Medsede ticcadeni imasiridsa: –Epeje, ohuati ajimani –najarissa tiquinaji, onajaro.

¹⁴Tohuati huanehema timadimanaji. Ima bicani huapi taraha tohuati huanehena deni tojajaro. Eti cahanerara canadsana Cristodsa ijariquinissa tajaro. ¹⁵Cristocca jonehe tibodidenidsa deni tojana. Najaro jonehema timecotedeni tedseje timadiridsa-manaji. Nema tiquinanijine Dio titohuideni huahua najari, pina Jesocristo pohua assire ojarijarissa tiquinanijine. Nema nadsapi Dio Pohuadsa naqui: –Jehe, tijine iadsa bica tani –titiquina naji.

¹⁶Jesocristocca marinaja bicabote tibodidenidsa madi-dsanapona. Aji tiadeni huapima Diocca tohuattehema titessedeni tedseje ahuaji mari, ahuaji mari titicanabaquimana najo. Diocca tohuattehema naqui titessedeni tedseje ahuaji nahatidse, ahuaji nahatidse titiquina naji. Diosda tetidsemanadsa naqui jiri jiri titiquina naji. Aji Dabicca jijiricca jiri jiri titiquina naji. Aji Dio Attidsodo nanicca jijiri tojanidsa naqui jiri jiri titiquina naji. Dio Corimejine jijiri ticanahatomanadsa naqui jiri jiri titiquina naji. Jiri jiri titiquina nadsa naqui tibodideni: –Jehe Abi Dio, epejeni. Ticca daniji iadsa bica

tani –titiquina naji. ¹⁷Nadsama aji Jesocristodsa tiquejenajaro huati huati tiquinadsa naqui ima tibodideni tinajoramanadsapi: –Ohuapi Jesocristocca ojani, ima bicanidsara huati huati onana –titiquina naji. Tidsepedeni ijimanadsa naqui pina ia Medsede Jesodsa tidsepedeni ijiridsamanajarossa tiquinana. Ticcadeni madie naqui ia Medsede Jeso onima timadiridsa-manaji. Tidsepedeni ijimanadsa, huati huati tiquinadsa naqui Jesocristo pohua onima Abi Diodsa: –Jehe, epejeni. Tijine iadsa bica tani –titiquina naji.

**Jesocristodsa tiquejenajaropi
ticcadeni madijadenidsa ajima
tiquinadsana bica tajaro**

¹⁸Amoneje maquideje ticajimanagerodeni, ticcadeni maquui attidsa iboraquuri tiquinaji. Nani aji Jesocristodsa tiquejenanicca ima tijinedeni ahuato tanijine. ¹⁹Maquideje amoneje ticajimanagerodeni, tiadeni naqui ticcadeni amonejedsa tetideni huanaquuri naji. Ticcadeni amonejedsa tettideni ocassera tejeraji. Johua ticanamana tejeraji, onajaro.

²⁰Ejedenideni, tiadeni naqui ticcadeni abi, ami attidenidsa iboraquuri tiquinaji. Nahi ia Medsede huatidsehijine. ²¹Nadsama abi, ami tiadeni naqui ticcadeni ejedeni tijinedeni huadimana-jarana. Tijinedeni huadimanadsapa tettidenidsa paja tohuibomanarihi narana.

²²Tarabajidsajine *medse tiquejenajaro, tiadeni naqui tiadeni dossede ajijaro namidsa madijari attidsa iboraquuri tiquinaji. Tarabajidsa najo tanicca tiadeni tocadossebaquuidsa naqui pohua attidsa iboraquuri tiquinaji. Tiadeni dossede qqui tadsa,

qqui taradnsa naco tidsepedeni ijimananissa taji. Pohuadeni atti: –Jehe, tijine bica tani –quinahijine tohuini tiquinani ojari-gerana. Dio noppine naqui ticappinamanadsa tibodidendi maidsa tadsa tidsepedeni ihijimana naji. ²³Tidsepedeni ijiridsamanadsa naqui madijadsa tidsepedeni ijiraha pina ia Medsededsa tidsepedeni ijimanajarossa najaro. Nadsapi tettidendi ajima tiquinaji: –Cristodsa jehe onadsapi ojine bica tana, onajaro –titiquina naji. Tidsepedeni ijimananissa tadsapi ia Medsede tinahatidsemanahijine. ²⁴Ia Medsede Cristopa tiadendi Dossedepajissa deni tojahicca. Pohuadsa tidsepedeni ijimanajaro manaconi tiadenidsa tojanijine nahatoqquri tiquinani. Najaroa aji nidsa memehuaji bacco tiquinadsapi Diocca daniji bicani huati tapojaricca tiadenidsa da inaridsanitohui. ²⁵Naraha tabaccorehe inanamanajardenipa poccadendi tabaccorehe manaconi pohuadenidsa tojanitohui. Ojariadsa itide, pamahadsa itide huati tohuanahi najarahitohui. Pocca najidsohue huapimadsa pajiranissa tanitohui.

4 ¹Nadsama dodossededeni, tiadendi naqui ticcadendi dodosse tabaqquidenicca tarabadsa manaconi pohuadenidsa da tiquinanissa taji. Aja pohuadeni tarabadsa quinahijine oppina tanicca, ssamo tanicca naqui dossemana tiquinejeraji. Tetidendi ajimamana tejeraji: Tiadendi naqui tiadendi Dossedepa memehuaji madihi. Nidsa dsotode najari pohuadsa tecomeramanitohui.

²Nadsama tiadendi huapimapi Diodsa huatide disseraqquri tiquinaji. Huatide tiquejenadsa naqui ima

onihitohui tibodidendi huatomana tejeraji. Dio Pohuadsa naqui: –Jehe, epejeni. Ticca daniji iadsa bica tani –titiquina naji. ³Itohui naqui Diodsa huati huati tiquinaji, nahi Pohuajine madija bodidendi najoramanapodsapa: –Jari, iadsa Jesocristo tahimari tecomeramanaji –quinahijine. Nani Jesocristo tahimari icassiejeranijinecca mari icanabaqquihijine, inajaro. Najaro ima tahide ahuatora taporaha jidapana iadsa tohuatojaro. Najaro ima ohuacomerajarojine toponi cocorodsa ohuedsajaropaji. ⁴Dio Atti ecomeradsa madija mittamanahissa tahijinena bica tajo. Nadsama Jesocristo tahimari ohuacomeradsa ojine ahuaoto tanijine naqui Diodsa huati huati titiquina naji.

⁵Diodsa jehe quina-jarajaridendi tedseje bacco ticaniredsapi tibodidendi huatonissa tadsa pohuadenidsa bicaqquri tiquinaji. Pohuadenidsa Dio Atti huati tiquinanijine tinajomana tejeraji. –Jidapana pohuadenidsa Jeso tahimari huati onana –tiquinaji. ⁶Aja Diodsa jehe quina-jarajaridendi tedseje imahaha ticanadsa naqui tettidendi bica tadsa pohuadenidsa huati huati titiquina naji, nahi Jesocristo tahimari tohui quinahijine. Tiadenidsa: –¿Jesocristocca imapi nejecoma najarona paji? –quinadsa naqui tibodidendi najoradsa tettidendi bica tadsa pohuadenidsa tetecomeramana naji.

Pablo pohua tessedeni nija naridsamanajari

⁷Imecote Tiquico pohuadsa eti huana najaro. Najarina tiadenihuaji dosse onadsa otahimari tiadenidsa huati tahitohui. Pohuapa obiji accode bica tade. Pohua tedseje

ia Medsededsa idsepe ijijarode.

⁸Pohuapa tiadenihuaji dosse onajari, itahimari tiadenidsa huati tahijine. Pohua naco tiadeni tonahatidsebaquihitohui. ⁹Imecote bica tajari Onesimo naco Tiquico tedseje tiadenihuaji tohuedahitohui. Onesimopa Jesocristodsa dissera tajari. Pohuapa titiqueriquimana nahihuajicca madija. Aji imadinihuajicca ima nemanehi tiadenidsa huati toquinahitohui.

¹⁰Nadsama aja otesse Aristacopa tiadenidsa nija nahi. Pohuapa ohua tedseje toponi cocorodsa ibedsajaro. Bernabecca madija Maraco naco tiadenidsa nija nahi. Aji Maraco tahimari timittamanapojaropi nidsa tiadenihuaji toccadsapa tinamadi-manahissa tana. ¹¹Aja otesse Jeso, oni ohuahapa Justo, najari naco tiadenidsa nija nahi. Najaridenipa jodiodeni Jesocristodsa toquejenajari. Pohuadenipa ohuadsama Diocca cacahuehe tahimarini tojaridsanijine idsepe ijiridsajarode. Pohuadenipa obodi oji naraha ohuati inassonamanajarode. Naraha aja jodio Jesocristodsa toquejenajarideni motapa ohua tedseje dsepedeni ijimana-jarade.

¹²Otesse Epafra naco tiadenidsa nija nahi. Pohuapa Jesocristodsa ibora tadsapa pocca dossenijidsa dsepe ijijari. Aja Epafra nahi Jesocristodsa titiqueriquimana nahihuajicca ahuaaji ccajonajari. Titohuideni Diodsa huatide dissera tajari. Ticcadeni jeheniji Jesocristodsa pajiranissa tanijine nadsa Diodsa huati huati dsadsanapo najari. Jesocristodsa jehe tiquinani todacorani nanijine naco Diodsa huati huati dsadsanapo najari. Dio Pohua jipa tahiccadsa, pocca dossenijidsa

iboraquiri tiquinanijine naco Diodsa huati huati dsadsanapo najari.

¹³Ohuapi Epafra ima nahato onadsa tiadenidsa huati onajaro. Pohuapa titohuideni bodi huatohua madijari. Aja odsa panani Laodiseahuajicca Jesocristodsa toquejenajarideni tohui, aja odsa panani Hieraporihuajicca tohuideni naco bodi huatohua madijari. ¹⁴Roca naco tiadenidsa nija nahi. Pohuapa icca jemedsi cacahuadeja najari, pohuadsa eti huanacquiri najaro. Dema naco tiadenidsa nija nahi.

¹⁵Nadsama ohuati naqui aja imecotedeni Laodiseahuajicca Jesocristodsa toquejenajarideni naqui nija onajaro. Nipadsa naqui nija onajaro. Nipacca odsahuaji Jesocristodsa quequeriquimana najaridenidsa naco nija onajaro. ¹⁶Ajijaro occa ima teppe hua tiquinehe jicadsapi aja Laodiseahuaji Jesocristodsa quequeriquimana najaridenidsa da tiquima-manana, onajaro. Aji occa ima teppe onihia Laodiseahuaji dosse onapojaro naqui nanidsa hua quinehe jicadsapi aji timadimanani Corosahuaji bacco tadsapi hua tiquinana, onajaro. ¹⁷Nadsama imecote Ariquipodsa naqui huati tiquinana: —Ia Medsede Dio tia cadossedsapa najarossa tinanaji. Dissera tinaji —tiquinana, onajaro.

¹⁸Ohuapi Pablo ajijaro ima teppe jicaniccana ohua odsepedsa dsodo onajaro. Tiadenidsa nija onajaro. Jehe, tetideni ajima tejerana, ohuapi toponi cocoro todsimadsa ohuedsaccani. Ohuapi tiadenidsa ohuati huana tadsapi ohuattipi: Diocca biquehe tiadenidsa tojadsanapona, onajaro. Epejeni, ohua onipi Pablo.